



UNIVERSITÄTS-
BIBLIOTHEK
PADERBORN

Universitätsbibliothek Paderborn

Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

Gregorio Sancti Theodori Diacono Cardinali apostolicæ sedis Legato, & O.
Acolytho nostro.

urn:nbn:de:hbz:466:1-20020

succursu, defensione ac pace regni, ad exemplar aliorum Comitum & Baronum ac etiam civitatum recipiatis hilariter & efficaciter observetis, prout ipsa ordinatio in capitulari continetur expressa bulla nostra munito, magistris Capitaneis humiliter intendentes qui ad executionem ipsius de mandato nostro fuerint constituti, ne si fortè, quod absit, quisquam præsumeret refragari, pœnam in ipsa ordinatione statutam incurrat, & nos manus nostras in eum spiritualiter ac temporaliter aggravemus. Quia verò propter fervorem ætatis ad præsens non possumus personaliter descendere in Apuliam, vices nostras super iis committimus exequendas dilecto filio nostro Gregorio sancti Theodori Diacono Cardinali apostolicæ sedis Legato, cui dilectum filium O. Acolythum nostrum à latere nostro transmissum duximus adjungendum.

GREGORIO SANCTI THEODORI
Diacono Cardinali apostolicæ sedis
Legato, & O. Acolytho nostro.

Epist. 111.
De eadem re.

Quia propter fervorem ætatis non possumus ad præsens descendere in Apuliam, vices nostras vobis duximus committendas, ut ordinationem quam fecimus super succursu & adjutorio Regis & defensione ac pace regni proponatis Comitibus, Baronibus, atque civibus per Apuliam constitutis, & inducatis eosdem ut ad exemplar eorum qui ordinationem ipsam apud sanctum Germanum in nostra præsentia juraverunt, jurent & ipsi se fideliter servaturos, duos ex ipsis, quos magis idoneos provideritis, magistris Capitaneos statuentes. Quocirca discretioni vestræ per apostolica scripta mandamus quatenus id prudenter & efficaciter exequi procuretis.

In nomine Domini. Amen. Ordinationem quam Dominus Innocentius Papa fecerit super succursu & adjutorio Domini Regis & super pace ac defensione regni ego . . . bona fide servabo, & pro posse meo faciam alios observare. Sic me Deus adjuvet & hæc sancta Dei evangelia.

Epist. 112.
Vide gesta Innoc. III. cap. 40.

Hæc est ordinatio quam facimus super succursu & adjutorio Regis & super pace ac defensione regni Siciliae. Videlicet ut nobiles viri P. Celanensis & R. Fundanus Comites sint magistri Capitanei, quibus super iis in Apulia omnes intendant. Quicumque ordinationem istam receperint, ad invicem sibi pacem

observent. Etsi quisquam ab alio fuerit offensus, non statim reoffendat eundem, sed apud prædictos Comites querelam deponat, qui eam secundum rationem & consuetudinem regni faciant emendari. Qui autem ordinationem istam recipere noluerit aut servare, tamquam hostis publicus habeatur, & à ceteris impugnetur. Ducenti milites dirigantur in succursum & adjutorium Regis usque ad Kalendas Septembris, moraturi per annum in expensis eorum à quibus fuerint destinati. Distribuantur autem secundum extimatorum arbitrium quos ad hoc specialiter deputabimus, pensatis debitis serviciis & propriis facultatibus Comitum & Baronum ac etiam civitatum; proviso etiam ut ad opus eorum victualia dirigantur. Civitates autem, Comites, & Barones assignent in propriis expensis certum numerum bellatorum ad mandatum Comitum prædictorum, si quando guerra contra quemquam propter hoc fuerit exercenda. In omnibus autem reservamus nobis plenariam potestatem addendi & minuendi, mutandi & declarandi, prout viderimus expedire.

COMITIBVS, BARONIBVS,
civibus, ceterisque regni fidelibus à Salerno usque Ceperanam de mari constitutis ad mare.

Viveritati vestræ præsentium auctoritate mandamus atque præcipimus quatinus nobiles viri P. Celanensi & R. Fundano Comitibus, quos super succursu & adjutorio Regis & pace ac defensione regni magistris Capitaneos constituimus, per omnia intendatis, ut ordinatio nostra per eos ad salutem & quietem Regis ac regni debitum consequatur effectum, statutis & mandatis ipsorum Comitum sine qualibet contradictione parentes, tam de militibus ad succursum Regis in Siciliam destinandis, quam etiam de militibus exhibendis contra illos qui præsumerent infringere pacem regni, secundum extimationem illorum qui de concessione nostra milites ipsos distribuunt ad mandatum Comitum prædictorum. Latorem verò præsentium dilectum filium W. scriptorem nostrum specialiter destinamus, ut ad exemplar eorum qui super ordinatione servanda juramentum in nostra præsentia præstiterunt, simile ab aliis recipiat juramentum.

Epist. 111.
De eadem re.